



Office of the  
**BODO SAHITYA SABHA**  
बर' थुनलाइ आफाद

Registration No. 94 of 1972

Website : [www.bodosahityasabha.org](http://www.bodosahityasabha.org)

E-mail : [bssjb@rediffmail.com](mailto:bssjb@rediffmail.com)

<b>Head Office</b> <b>R.N. Brahma Bhawan</b> Kokrajhar, BTAD (Assam) Pin - 783370 Ph. & Fax : 03661-276528
<b>Sub-Office</b> <b>J.B. Hagjer Bhawan</b> Nayanpur Road, Ganeshguri Guwahati - 781006 Ph. & Fax : 0361-2203522

**गोजोन, खौसेथि आरो गोरोबलायनाय थासारि सोमजिहोनायनि थाखाय आलांगा मेल**

**थावनि : राडापारा फरायसालिमा नब्लां, राडापारा, श'णितपुर, आसाम**

**खालार : 14 सेप्टेम्बर, 2014, सम : फुनि 11-00 रिगा**

जागायजेननाय बिबुंथि,

सिबिनां दिनैनि बे बर' थुनलाइ आफादनि हांखायनायाव गोजोन, खौसेथि आरो गोरोबलायनाय थासारि सोमजिहोनायनि थाखाय खुंनो लानाय आलांगा मेलनि आफादगिरि आरो बर' थुनलाइ आफादनिबो आफादगिरि ड० कामेश्वर ब्रह्म सार, बे मेलान बाहागो लानो हानाय बर' हारिनि गेदेमा राजखान्थि हानजा, राजखान्थि हानजा नडै हारिमायारि गौथुम, समाजारि आफाद, बिग्रायारि-वारग' बिग्रायारि आफादनि दैदेनगिरि नोंथांमोन, गेदेमा मेलेमजिबि, रायजो-राजा आरो फरायसा फंबाय बिनानावमोन। गिबि गिबियावनो आं बर' थुनलाइ आफादनि जानानै नोंथांमोन बयनिसिमबो जौनि सिबिनाय आरो गाहाम हामब्लायाय जासि हरना बयखौबो बरायबाय।

हे गेदेमा हारि आरो समाजनि दैदेनगिरि नोंथांमोन, बर' थुनलाइ आफादआ दिनैसिम गावनि थांरिखि- बिथांरिखि गोजेराजो बर' हारिनि गेजेराव नुजानाय खैफोद-आफोद आरो अलखद समाव जेब्लायबो राव होबोदों आरो बर'फोरनि गेजेराव गोजोन, खौसेथि आरो गोरोबलायनाय थासारि सोमजिहोना नाजाबोदों। बर'फोरा गाव-गावनि गेजेराव गोजोन, खौसेथि आरो गोरोबलायनाय सोमजिहोना गुबुन गुबुन हारि-हारिसाफोरजों माबादियै गोजोन, खौसेथि आरो गोरोबलायनाय थासारि सोमजिहोना हायो बेखौ नाजाबोदों। नाथाय थांनाय समफोराव जों नुनो मोनबोदों दि, जौनि गेजेराव सानफा एफा समाजारि, गौथुमारि आरो राजखान्थियारि दिगआव गोजोन, खौसेथि आरो गोरोबलायनाया थेर-बेथेर जालांनो हमदों। जौनि गेजेराव खुंनाय बिबानाव थानाय राजखान्थि हानजा आरो बेनि बेरेखा हानजानि गेजेराव मोजां सोमोन्दो आरो गोरोबलायनाय गैथिनि थाखाय जौनि समाजारि आरो गौथुमारि दिगआव फारागथिया बांलांनायनिफ्राय बांलांबाय थादों। जायनि थाखाय जौनि गेजेराव थानाय बर' समाजारि, हारिमायारि गौथुमफोर आरो माखासे दोहोरोमारि गौथुमफोराबो बर' हारिनि जानानै गारांसेयै खोथा बुंनो हाया जालांदों। राजखान्थि हानजानि दैदेनगिरि, बिबानगिरि आरो सादारन सोद्रोमाफोराबो गावनि गेजेराव बेयो बिखौ, बैयो बिखौ दाय आरो अजद होलायनायनि थाखायनो राजखान्थियारि थासारियाबो गुबुंले जालांदों। बर'फोरनि गेजेराव हाथियार लाना सोमावसारग्रा बिग्रायारि गौथुमफोरनि गेजेरावबो खौसेथि आरो गोरोबलायनाया थेर-बेथेर जालांनो हमदों।

बर'फोरनि हांखायनाय-खावलायनाय लेखा मोनसे समाव मुझी हाग्रामा महिलारिनि दैदेननायाव बि. एल. टि.या भारत सरकार आरो आसाम सरकारजों ग'थायै सावरायनायाव बाहागो लानायनि थाखाय आरो बर' हारिनि मोनफ्रोमबो हारिमायारि आरो समाजारि आफादफोरा मदद आरो हेफाजाब होनायनि थाखाय बि. एल. टि.नि दाबि आरो सावरायनाया खम समनि गेजेरावनो जाकुंसार जादों आरो जेंनाखौ सुझांनो हादों।

नाथाय दिनै बर'फोरनि उदांमिनि थाखाय जोनोम जानाय एन. डि. एफ. बि. बिग्राइयारि गौथुमनि सावरायनाया ग'थायै आरो खौसेथियै जायिनि थाखाय भारत सरकारआ सावरायनायनि मुडव सावरायना जेंनाखौ सुझांनायनि सोलाय बांहोनायसो नुनो मोनदों। बुंथावाब्लाबो सैथो दि, एन. डि. एफ. बि. आ सावरायनायनि मुडव गावसा गावमि जानायनि थाखायनो भारत सरकारआ खाबु लाना सावरायनायनि गुबै थांरिखाव दाबो सहै होवाखै। सावरायनायनिफ्राय गोजानाव

Cont. ... 2

थाबोनाय मुझी रन्जन दैमारिनि दैदेननाय एन. डि. एफ. बि. हानजाखौ सावरायनायाव लाबोनो थाखाय बर' हारिनि मोनप्रोमबो समाजारि, हारिमायारि गौथुम आरो राजखान्थियारि हानजाया बि. एन. सि. नि गेजेरजों नाजानायनि थाखायनो दिनै मुझी रन्जन दैमारिनि हानजाजोंबो भारत सरकारा सावराय जेननो लाबाय। नाथाय फिन मुझी आइ. के. संबिजिदिनि दैदेननायाव एन. डि. एफ. बि. नि मोनसे हानजाया सावरायनायखौ बेरेखा खालामना ओंखारलांबावबाय। जायनि थाखाय बर' हालामाव जायखि जाया बुथारनाय, लांखारनाय, गावथारनाय जाथाइ सोमजिब्लानो एन. डि. एफ. बि. (संबिजिद) हानजानि मुझ सरजाब जाफायो।

सादारन आबादारि, फिसा-फिला फालांगि, फोरोंगिरिफोरनिफ्राय सिग सोग' रां खानाय, खानाय रांखौ होवाब्ला बुग्लुं-सोग्लुं खालामनाय, मानसि लांखारनाय आरो बुथारनाय-गावथारनाय आरि जाथाइफोरा सम सम जाफलेबाय थानायनि थाखाय बड'लेण्ड हालामाव थानाय उन्दै-गेदेर हारि-हारिसाफोरा बर'फोरनि बेरेखा जालांबाय आरो जॉनि फारसे फोथायनाया गैया जालांबाय। सावरायनायनि बेरेखायाव थानाय एन. डि. एफ. बि. (संबिजिद) हानजानि हिंसायारि जाथाइया सानफा-एफा बांलांनयनिफ्राय बांलांबाय थारों। बिग्राइयारि आफादनि आखुनिफ्राय दोरोदना उदखारि आफाद बादिसो खामानि मावनो हमदों। बेयो बर' समाजाव गांजि गोहोम गोलैदों।

बावयैसो सिरां जिलानि राणीखातायाव भारतारि रौनिया हानजा आरो एन. डि. एफ. बि. (सं) हानजानि गेजेराव जानाय दावहायाव सा 5 एन. डि. एफ. बि. (सं) बिग्राइयारि थैनो गोनां जानाय जाथाइया फोरमान होयो दि, भारतारि रौनियाफोरआ गोखों बेरेखा दावहानि थाखाय गसंदों। बे जाथाइखौ जों सोंखारियो। नाथाय एन. डि. एफ. बि. (सं) हानजाखौबो बेबादि दावहायाव जिउ गारनायनि सोलाय गोजोन सावरायनायाव बाहगो लानो थाखाय खावलाय हरो। एन. डि. एफ. बि. (सं) हानजानि फाइखि गाहाइ बि. बिदाइया खौरांगिरिफोरजों मोगा-मोगि बिबुंथिनि गेजेरजों अजद होनाय बादिब्ला बे गावलायनाय दावहायाव सावरायनायाव बाहगो लानाय एन. डि. एफ. बि. (रन्जन) हानजानि सोद्रोमा लोब्बा दं। बेखायनो बेनि संगालि हाबा मावनायनि दायव खासि-बिसि रायजो-राजानि सिगाडव सासे जि थाखोआव फरायबाय थानाय फरायसा प्रिया बसुमतारिखौ गावथारनाय जादों। थारैनो बे जाथाइया सुबुं खान्थिनि बेरेखा आरो बर' हारिनि मान-सन्मानखौ मुलुग दरबाराव गाहाय खालामनाय जादों। आधिखालाव बर' थुनलाइ आफादआ दाबि खालामनाय बादिनो आसामनि गिबि मन्थिया बे मुगैथाव गावथारनाय जाथाइ आरो सा बा एन. डि. एफ. बि. (सं) सोद्रोमा गावथारनाय जाथाइखौ आयेनारि नायबिजिरनो थाखाय मोनसे आफाद दानो फोसावदों। नाथाय जों बे जाथाइनि थार गुमुरखौ दिहुननो थाखाय भारत सरकारनि सि. बि. आइ. नि गेजेरजों नायबिजिरनायनि राहा खालामनांगों होनना दाबि खालामदों। जा समाव बि. एन. सि. खौ लाफानानै बर' थुनलाइ आफाद आरो गुबुन गुबुन समाजारि- हारिमायारि आरो राजखान्थियारि गौथुमफोरआ एन. डि. एफ. बि. नि सावरायनायखौ ग' थायै आरो खौसेयै जानायखौ भारत सरकारनि खाथियाव दाबि खालामबोबाय थारों आरो गावस्रनाय एन. डि. एफ. बि. खौबो ज'थै मोनसे आरांगयाव भारत सरकारजों सावरायनो थाखाय खावलाय बोबाय थानाय जादों। बे समाव एन. डि. एफ. बि. (सं) आरो एन. डि. एफ. बि. (आर) आ मोगा-मोगि गावलायनाय आरो दावहा नांनयसिम आवगायदोंब्ला बेयो हारियाव बेसेबां गांजि गोहोम गोग्लैगोन बेखौ सानहरब्लानो नुहरखायो। बेबादि गावनि गेजेराव फोजोबस्रांलायनाय हाबाफारिनिफ्राय जानगाराव थानानै खौसेयै सावरायनायनि मासियाव फैनानै बड'लेण्ड आरो बेनि खाथि-खाला थानाय बर' हालामाव गोजोन, खौसेथि आरो गोरोबलायनाय थासारि सोमजिहोनायखौ गासै बर' माहारियानो हास्थायदों आरो लुबैदों। बर' हारिनि बे लुबैनाय आरो हास्थायनायखौ मान होनानै बयबो आवगायबोगोन, बेखौ जों खावलायो।

फारसेथिं बि. टि. सि. सोरजिनाया 10 (जि) बोसोर बारलांनयनि उनावबो थार जौगानायखौ रायजो राजाया मोननो हायाखै होनना बर'-अ'बर' रायजो राजानि बिग्राइनाया सानफा एफा बांलांनयनिफ्राय बांलांनो हमदों। जायनि थाखाय समाजाव बेरेखा सानलायनाया बारानिफ्राय बारसिन जालांनो हमबाय। गुबुन गुबुन हारि-हारिसाफोरा बर'फोरनि जानगाराव थाना आलादा आलादा गौथुम-आफादफोर दानानै बिग्राइखांबाय आरो भारत संबिजिदिनि 6 थि फारियाव दाजानाय बि. टि. सि. नि बेरेखायै जांखिखांना दिल्ली दरबारआव मोनहैबाय। जॉनि साखाथियाव थानाय गाव ट्राइबेल हारिनिनो खायसे हारिसाफोराबो बायदि जाहोनाव सानफा एफा बर'फोरनि बेरेखा आरो बर'फोरनि गोजानाव थानो हमलांबाय।

थानाय 17 जुलाइ, 2014 खालारखालि बर' थुनलाइ आफादनि सा स्नि मिरु बिबानगिरि आफादनि बिबानगिरिफोरआ



गोदान दिल्लीयाव सावरायनाय समाव भारत सरखारनि राज्योयारि न'खर मन्त्रि मुष्ठी किरिन रिजिजु बिथाड आथिखाल बड'लेण्ड हालाम आरो बेनि खाथि-खाला सोमजिनाय थासारिखौ सोंखारिदों आरो बर' हरिनि गोजामसिन राव-थुनलाइ आरो मेलेमजिबिफोरनि आफाद हिंसाबै बड'लेण्ड आरो बेनि खाथि खाला सोमजिनाय जायखि जाया हिंसायारि जाथाइखौ होबथानो थाखाय जायगा जायगा गोजोन, खौसेथि आरो गोरबलायनाय थासारि सोमजि होनो थाखाय मेल खुंनो सुबुरुन होदोंमोन।

श'णितपुर जिलानि आसाम-अरुणाचल सिमायाव गेजेर गेजेर सोलिबाय थानाय सिगि-सोग' रां दाबिनाय, मानसि लांखारनाय, मानसि गावथारनाय आरि जाथाइयाव एन. डि. एफ. बि. (सं) हानजा लोब्बा दं होनना अरुणाचल हादरसायाव बायदि फसंथानाव एबा सोरनिबा न'खरआव खामानि मावना थाहैनाय, बेफार फालांगि खालामहैनाय बर' सेंग्रा-सिख्लाफोरनि सायाव अरुणाचली सुबुंफोरा गात्रि नोजोरजों नायग्रा जाबाय। जोंनि साखाथियाव थानाय हादरसायावको जोंनि खामानि गैजारोडि-सेंग्रा-सिख्लाफोरा खामानि मावना, बेफार-फालांगि खालामना जाहैनो हायाब्ला बड'लेण्ड एबा आसामाव बेसेबां खामानि गैजारोडि-सेंग्रा-सिख्लाफोरनो जों खामानि दिहुनना होनो ह्यदों। बेयो जोबोर साननांगौ बाथा जानानै फैबाय। फारसेथि थानाय सुबुं आफादनि बिसायख'थिनि उनाव बर' बेरेखा कंग्रेस हानजानि खायसे दैदेनगिरि आरो खायसे गुबुन गुबुन राजखान्थि हानजा आरो गौथुमनि दैदेनगिरिफोरआ बर' बेरेखा गोसो लाना बायदि रोखोमनि थुनज'लायनाय बिबुंथि आरो खैसारि खालामनो ह्यदों। सोरबा गुबुन समाज बेरेखा थामथि गोहोआ मावनाय हिंसायारि खामानिखौबो बर' बिग्राइयारिफोरआनो मावदों होनना बांसावनो हमबोदों। थेवबो बर' हरिनि बायदि हानजा-गौथुमफोरआ खौसेयै गसंनो आरो गोरबलायनो हायिया दुखुनांथाव। जोंनि गेजेराव गोबां राजखान्थियारि, हारिमायारि, थुनलाइयारि, समाजारि, दोहोरोमारि, आयजो आफादफोर, बारग' बिग्राइयारि आरो मेलेमजिबिफोरनि आफादफोर दंसोगारो। नाथाय जों नोजोर होबोदों बड'लेण्ड हालाम आरो बेनि खाथिखाला सोमजिनाय हिंसायारि जाथाइफोरखौ गोख्रों रावयै सोंखारिनाय एबा बेफोरबादि समाज बेरेखा हाबानिफ्राय जानगाराव थानो खावलायनाय नुनो मोना। माब्लाबा माब्लाबा बर' थुनलाइ आफादखौसो सोंखारिना बर' थुनलाइ आफादआ मा सिरि-सिरि थाखोब्रा होनना बुंहरग्रासो दंसोगारो। नाथाय जोंहा बयहाबोदि बिबान दं बेखौ सानतो हाया। सोरबा सासेनि सोंखारिनाय आरो खावलायनायबोदि समाजाव गाहाम गोहोम गोलैहोयो बेखौ बयबो मिथिनाया गाहाम। आथिखालाव भारत सरकारनि न'खर बिफाननि गोजौ संगालि बिफाननि सुलुंनिफ्राय मिथिनाय बादिब्ला इसलामिक जेहादी उदखारिफोरआ आसामखौनो गाग्लोबनायनि खैसारि खालामदों। बेफोरबादि जेहादीफोरनि उदखारि खामानिया जाहाथे बड'लेण्ड आरो बर' हालामाव गोहोम खोख्लैनो हाया बेखौबो खौसेयै नोजोर लाखिनो नांगोन। नडाब्ला समाज आरो हादरआ जोबस्रांलांगोन।

बेबादि बर' हरिनि गेजेराव नुजानाय अलखद, खैदां-खैफोदफोरखौ जोंनि गेजेरनि गेदेमा दैदेनगिरिफोरनि गेजेरावनो सावरायलायना माबा मोनसे राहा लामा दिहुननो हायो नामा बेखौ सावरायनो थाखायनो बे आलांगा सावराय मेल खुंनायनि थाखाय बर' थुनलाइ आफादआ बे हाबाफारिखौ लाबोदों। बेनिनो दिनै राडापारा फरायसालिमा न'ब्लांआव बे बाथि एबा जोबथा मेलखौ खुंनो लानाय जाबाय। बेनि उनाव गुबुन गुबुन हारि-हारिसानि हारिमायारि, समाजारि, आरो फरायसा गौथुमनि दैदेनगिरिफोरखौ लानानै बड'लेण्ड हालामाव गोजोन, खौसेथि आरो गोरबलायनाय थासारि सोमजि होनायनि बेबादि आलांगा सावराय मेल खुंनो थाखाय साननाय जादों। मिजिंथियो बे दिनैनि बे आलांगा सावराय मेलव नोंथांमोना गावबा गाव बुंनांगौखौ उदांयै सावरायगोन आरो नांगौ बादिथै सुबुरुन होनानै जोंनि थांखि बिथांखिखौ जाफुंसार खालामगोन। एसेनोसै-

गोजोनथों—

मुष्ठी कमलाकान्त मोसाहारि

गाहाइ नेहाथारि

बर' थुनलाइ आफाद

खालार: 14-9-2014

फन नं : 94351-90874